

No laga Dande kaba II

Permitimí duna apoyo na e suplica y deseo di Sr Ismael Croes pa nos retene dandé como un patrimonio. Como un herencia. Mi tambe na varios ocasion a haci e suplica aqui. Pero no solamente e „Dandé” mester ser protehá. Tur locual ta pertenece na e tradicion y folklore di Aruba mester ser protehá. Varios grupo y personanan na Aruba ta haciendo esaki, entre otro e grupo „Mascaruba” y „De Trupialen”, pa cual ta bai mi gratitud. Pero mi no ta di acuerdo cu mester stop tur baile riba Aña Nobo. Mi no por quere den obliga ningun hende queda cas pa recibi dandé. Mas bien mi ta quere na siña nos yunan su nificacion y balor cultural y no modernizá dandé y canta co'i loco na radio y television. Esaki ta caba cu nos dandé. Esaki ta cabando cu nos tradicion, folklore y cultura. Tampoco nos no mester permiti nos mes e luho di queda queto ora otronan ta squirbi locura. Nos, Arubiano, mester cuminsa publicá y duna splicacion na nos Pueblo. Nos mester inculcá amor patrio den e mente y almanan chiquito. Sinembargo tambe PRENSA mester yuda. Y mediante e carta aqui mi ta pidi „Amigo” encarecidamente di stop cu „SAMBUMBU” promer cu e locuranan, mitar berdad, exageracion y mentiranan bira hecho historico.

Na e Pueblo mi ta pidi pa stop di compra e „nabornan” aqui, pasobra mi ta considera e parti cu ta toca Aruba pa locual ta chiste, proverbio, bruha y medicina local etc., un ofensa na inteligencia di e Pueblo Arubano. Si Curaçao quier honra e autor pa loque e ta squirbi di Curaçao, esey ta nan bon derecho.

Di Aruba mi no por aprecié pasobra e ta basa riba fantasia, falta di conocimiento di e materia, falta di investigacion y falta di e dominio di papiamento. (Hasta su Hulandez ta malo.)

Si un autor no sabi e diferencia ni e nificacion entre desengañá y gaña, anto ta tempo pa bai school cerca e varios maestronan capacita y versa den papiamento. Si un autor no tin suficiente cariño pa verdad (anto un pastor) pa tuma e molestia pa ristra un mapa di Aruba pa e mira con un nomber ta ser squirbi, o pa averigua si tin hende ta biba na e lugar aqui, awor o den lo pasado, anto e locura cu a aparece den Amigo di dia 14 di november u.p., no por tuma lugar. E nomber ta „Cashunti” y no tin ningun hende ta biba n'e baranca 'qui. E storia di „Boton” ta chasco, no berdad. Y mi ta quere cu si „Amigo” quier carga un bon nomber como „periodista” e requisito primordial ta haci investigacion promer cu publica.

JULIO MADURO.